

# Sorumutuk Konsellu Ministrus nian loron 15 fulan-Abril tinan 2020

## Prezidénsia Konsellu Ministrus

VIII Governu Konstitusionál

---

### Komunikadu Imprensa

#### Sorumutuk Konsellu Ministrus nian loron 15 fulan-Abril tinan 2020

Konsellu Ministrus hala'o sorumutuk iha Sentru Konvensoins Dili no asiste ona apresentasaun husi Ministru Koordenadór Asuntus Ekonómikus iha ezersísio, Fidelis Manuel Leite Magalhães, kona-ba polítika ekonómika atu hatán ba COVID-19. Durante apresentasaun ne'e, hatudu mós previzaun kona-ba konsekuénsia ekonómika sira husi COVID-19 no resposta hirak ne'ebé iha possibilidade atubele implementa tuir evolusaun husi situasaun iha rai laran. Iha apresentasaun ne'e, kestaun hirak ne'ebé sai nu'udar prioridade mak apoiu ba distansiamentu sosiál no ba saúde, protesau ba ema sira no ba sira-ne'ebé mak vulneravel liu no apoiu ba traballadór no empreza sira.

Konsellu Ministrus aprova ona projetu kona-ba Dekretu Governu nian ne'ebé Ministra Finansas iha ezersísio, Sara Lobo Brites, apresenta, kona-ba regra sira ba ezekeusaun despeza sira husi Fundu COVID-19. Fundu ne'e, ne'ebé kria liuhusi Lei n. 2/2020, loron 6 fulan-abríl no regulamenta husi Dekretu-Lei n. 12/2020, loron 14 fulan-abríl, ninia objetivu mak atu finansia despeza sira-ne'ebé relasiona ho prevensaun no kombate hasoru COVID-19. Dekretu-Lei ne'ebé agora hetan aprovasaun ne'e atu estabelese regra sira ba ezekeusaun despeza husi Fundu COVID-19 nian, hodi define prosedimentu ne'ebé Ministériu, órgaun autónomu laho reseita própria no serbisu autónomu sira tenke halo tuir atu submete, ba Fundu ne'e, sira-nia pedidu kona-ba pagamentu hirak ne'ebé relasiona ho medida sira ba prevensaun no kombate COVID-19. Prosedimentu ne'e inklui preparasaun planu asaun sira ne'ebé integra medida ida-idak ba prevensaun no kombate COVID-19, ne'ebé entidade ne'e atu ezekeuta, kalendarizasaun kona-ba medida ida-idak no nia kustu. Planu asaun sira sei hetan apresiasaun husi Komisaun Interministeriál ba Koordenasau kona-ba Implementasaun Medida sira ba Prevensaun no Kontrolu Surtu Koronavirus Foun, ne'ebé sei avalia nia adekuasaun ho estratéjia nasionál ba prevensaun no kombate COVID-19. Despeza hotu-hotu ne'ebé integra iha planu asaun sira sei selu tuirmai liuhusi Fundu COVID-19, tuir mekanizmu sira-ne'ebé kria ona. **REMATA**

url: <http://timor-leste.gov.tl?lang=tp&p=24107>